

tum verberatione per diem quassasse, & adhuc propugnato-
res intrepide se tueri. Eo nuntio commotus, quod tantum
ausos Epidauros cognovisset, ut armatis navigiis, absque ejus
permisso in Adriaticum exiissent, statim eo se conferre de-
crevit, auctoritate ac presentia ratus fore, ut a cœptis de-
sisterent, atque interim, quæ mens publica sit, intelligere pos-
set. Perlectis in Senatu Paschalicis literis, in eadem sententia,
minime Augustanos recipiendos esse, Patres perstiterunt; satius
atque æquius arbitrati, ut, si qua inveniri posset, eorum
cum Epidauriis conciliandi ratio iniretur. Itaque legato præ-
ceptum, ut Augustanos homines, quos apud se habeat, so-
latus, eorum incolumitati perspecturum Senatum affirmet:
interim sibi persuadeant, hoc rerum statu nihil eis tutius fo-
re, quam si in gratiam cum Epidauriis redeant; in id om-
nem operam, studium, auctoritatem adhibiturum, atque ut
satis iis fiat, curaturum polliceatur: aliquem vero ex suis
Epidaurum mittat, vel (si ita sibi videatur) ipse cum dua-
bus triremibus in Sanctæ Crucis portum profectus, significet,
molestè tulisse, quod adversus edictum armato navigio in
Adriatici sinus loca penetrassent; quod, publica quiete per-
turbata, arma in ditionum Reipublicæ visceribus tractassent:
Senatus nomine hortetur, quæ justa sint, in Augustanos de-
cernant; æquis gentis postulatis satisfaciant; non sine eorum
gravi periculo exortos tumultus comprimere quamprimum curent;
eo loco res esse, ut ni cito caveant, gravia pericula subituri
videantur: de re communi, de privato eorum commodo agi:
ne diutius efferri eos motus sinant, aliquid Reipublicæ tribuant,
sibi que ipsis recte consulant. Hæc summa literarum erat. Ve-
rum de eventu dum Patres solliciti, quid jussus Paschalicus
effecerit, expectant, aliæ ab eo literæ perferuntur: discessum
paranti renuntiatum fuisse, primo Epidauriorum appulsu
Augustanos ad portum descendisse, arcis claves detulisse,
tresque ad eos legatos misisse. At dum itineri se commit-
tit, ut rerum exitus e propinquo speculetur, tres ad eum
oratores ab Epidauriis accedunt: cum armatis navigiis in
sinum Adriaticum egressum excusant, quæque egerint, ne-
cessitate compulsos ad rebelles obterendos egisse testan-
tur. Eos legatus gravibus allocutus verbis, quod adversus

Senatus
mandata
ad Pascha-
licum lega-
tum.

Epidau-
riorum ora-
tores ad
Paschali-
cum.